



Komunikadu Imprensa
21 Marsu 2024

**JSMP fahe informasaun kona-ba Asesu ba Justisa Formál ba iha
estrutura no comunidade Aldeia Camalpun, Suku Lihu, Ermera**

Iha 07 Marsu 2024, JSMP fahe informasaun kona-ba asesu ba justisa formál ba estrutura aldeia no comunidade, iha Aldeia Camalpun Suku Lihu, Postu Administrativu Railaku, Munisípiu Ermera.

Objetivu hosi dezamina informasaun ne'e atu hasa'e koñesimentu lideransa komunitaria no membru comunidade sira kona-ba direitu umanu, definisaun hosi lei, tipu no pena hosi krime sira, Violénsia Bazeia ba Jéneru (VBJ), oinsa rezolve disputa sira inklui fahe informasaun kona-ba serbisu hosi rede referral nian.

“JSMP apresia as tebes ho antuziasmu comunidade nian iha Aldeia Camalpun ne'ebé mak ativu tebes hodi partisipa iha fahe informasaun ne'e. Espera informasaun ne'e bele hasa'e koñesimentu partisipante sira-nian hodi bele kontribui ho efetivu no di'ak liután iha prevene no kombate krime sira liu-liu Violénsia Bazeia ba Jéneru iha aldeia refere no mós iha suku laran hodi bele kontribui ba pás iha Timor-Leste”, dehan Sra, Dra. Ana Paula Marçal, Diretora Ezekutiva JSMP.

Durante treinamentu ne'e, partisipante sira hato'o sira nia preokupasaun balun mak hanesan direitu sira ba halo manifestasaun, kazu rai ne'ebé seidauk iha desizaun parte balun halo ona kontrusaun, baze legál sira kona-ba fahe eransa hosi inan-aman ba oan sira ligadu ho kultura patrilineal no kazu violénsia doméstika ne'ebé aas oinsa autoridade aldeia sira ne'ebé rezolve ka lae.

Relasiona ho preokupasaun hirak ne'e, JSMP esplika katak relasiona ho direitu kona-ba liberdade ba manifestasaun, Konstituisaun RDTL mós garantia liberdade ida ne'e no iha ona Lei spesífiku, Nú.1/2006 kona-ba Liberdade ba Reuniaun no Manifestasaun ne'ebé mak regula nu'udar meu ida hosi Estadu atu garante kondisaun comunidade hodi ezerse nia direitu no liberdade sira ba manifestasaun nu'udar espresaun públika no opiniaun ka sentimentu hamutuk nian kona-ba asuntu públiku, sosiál ka seluk.

Enkuantu kona-ba disputa rai nian ne'ebé parte seluk halo konstrusaun sein desizaun hosi tribunál nian, JSMP esplika katak ne'e kontra Lei Sivíl tanba ne'e hosi parte interesadu sira tenke halo keixa ba tribunál atu halo impedimentu ba konstrusaun ne'ebé halo ona hodi hein desizaun tribunál nian.

Relasiona ho direitu ba eransa rai hosi inan-aman, tuir lei tantu oan feto ka mane iha direitu hanesan, maibé pontu prinsipál mak antes fahe ba oan sira

tenki iha karta prokurasaun ida hodi bele asegura katak rai ne'e intrega ona ba oan ho naran hanesan ne'e nu'udar direitu ida ba ona refere bele uza rai ne'e hanesan na'in.

Entrentatu, kona-ba kazu violénsia doméstika ne'ebé aas iha comunidade no oinsa halo prevensaun, JSMP hatan katak meu importante atu prevene kazu violénsia doméstika mak presija nafatin iha sosializasaun ba comunidade sira kona-ba Lei Kontra Violénsia Doméstika no oinsa comunidade sira bele hatene katak bainhira mosu problema ruma la tenke rezolve ho krime, no bainhira mosu ona krime ho natureza violénsia doméstika ninia prosesu tenke ba to'o tribunál labele hakotu de'it iha suku, tanba violénsia doméstika nu'udar krime públiku.

Partisipante ne'ebé partisipa iha dezeminasaun informasaun ne'e hamutuk ema na'in 36 ne'ebé kompostu hosi mane 25 no feto 11. Partisipante sira ne'e, mak hanesan xefe aldeia, delegada/u, representante eskola no representante igreja, no mós comunidade sira.

Atividade ne'e, realiza hosi JSMP, liuhosi Programa Apoiou Seguransa Komunitáriu (PASK) tanba serbisu hamutuk ho The Asia Foundation (TAF) ne'ebé finansia hosi Embaixada Nova Zelândia iha Timor-Leste.

Atu hetan informasaun kompleitu, favor kontaktu:

Ana Paula Marcal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl